

## Naie formoon foon e Domowina beseecht frasch manerhäid

*Bräist.* Am e lääge foon e frasch manerhäid informiird ham di naie formoon foon e sorbiische ferbånd Domowina, David Statnik. Di 28 iir üülje tächniker stoont sunt uurs önj e spase foon e sorbische tåågeferbånd, wat näist iir san 100. iirdäi fiirt. Statnik beseecht tujarst et frasch-dänsch schölj önj Risem. Schöljlidjer Jörgen Jensen Hahn köö ham wise, dåt grute diile foon e unerrucht aw frasch hülen wårde. Önjt Nordfriisk Instituut önj Bräist ferkläärd Prof. Dr. Thomas Steensen et årbe foon e inruchtung än ferteeld am sin maning apgoowe. Önjt Friisk Hüs informiird Erk Hassold, formoon foon e Frasche Rädj, än geschäftsfäärer Frank Nickelsen am jare årbe än am et ferhüülj tu e Ååst- än Weestfrasche. Statnik nüm e lååsing önj än hüülj en fordreeging aw e iirsfersoomling 2012 foon e instituutsferiin.



## Schoulere aw Sal foue uursfeerie

*Kil.* Da schoulere aw Sal foue ouf näiste februar iin waag uursfeerie, am et üttupräiwen. Deerfor wårde aw e ouder sid da harfstfeerie foon trii aw tou waage ferkorted. „We reagiire ma diheere regjonaal än tidlik begränsde fersäk aw en lung diskusjoon än aw e wansch foon maning Salringer“, diiljt Slaswik-Holstiins bildingsminister Ekkehard Klug änjørsne ma. Äädergrün as et müülj än mååg for mör familiie awt ailönj en gemiinsoom feerietid möölik. We präiwe et nü önj e praksis üt. Jarst dan wårt rucht önjtschääsd“, säa en spreeger. Aw e nordfrasche ailönje hääwe da bjarne bit nü trii waage harfstfeerie än deerfor bloot 5 waage samerfeerie. Önj e oktoober wårt ouers foole mör personaal brüked as önj e februar. Ploond san da uursfeerie for Sal nü foon e 13. bit 17. februar, deerfor jeeft et bloot harfstfeerie foon 4. - 19. oktoober.

We lååsie jam åltumååle hartlik in tu üüs **wunterfäst**, än fraidi, e 3. februar 2012 am e kl. 19 aw „Fraschlönj“ önj Risem.

Wir laden Euch alle herzlich ein zu unserem **Winterfest**, das am Freitag, dem 3. Februar ab 19 Uhr in der Gaststätte Fraschlönj in Risum stattfindet.

## V. Tams Jörgensen pris 2011

*Doogebel.* Bait leest drääwen foon e årbesfloose spräke än literatuur foon e feriin Nordfriisk Instituut önjt Stroonhotäl önj Doogebel köö e forwüset foon e floose, Jule Homberg, tweelwen friiske spräkeaktiwiste begröote. Deermade di Öömranger Jens Jessen, wat e nordfriisk wersjoon foon Wikipedia forstald, wat as „Frisipedia“ nü sunt iinj iir önjt neet as. Önj e madelpunkt foont drääwen stöo ouers et bekånd måågen foon e wuner foon e V. Tams Jörgensen pris 2011. Jarling schölj e Beaufort-Skala ouerseet wårde. Fiiw manschne hääwe jam dideere apgoowe stald. Insånd wörden sūdånji forsliike aw Sölring, Wisinghiirder Freesk, Öömrang än Mooring. Åle insånde forsliike wjarn sü gödj, dåt e jury har ai önjtschiise köö än nån ainkelten wuner ütseecht. Et prisgiilj foon 250 euro wörd uner åle fiiw apdiild.

## Friisk loonkoord

*Ljouwert.* Di weestfrasche Ried fan e Fryske Beweging heet en nai interfriisk loonkoord ütdänj. Åle friiske lönje foon Alkmaar bit tu e dänsch gräns san as iinj regjoon oufbilded. Et as e jarst interfriisk koord ma bloot weestfriiske stäänoome. Önj Nordfraschlönj san e noome aw nordfriisk än önjt Seelterlönj aw Seeltersk. Di jarste aplååge foon e koord lait bai 1000 stöögne. Mör informatsjoon jeeft et aw [www.fryskebeweging.nl](http://www.fryskebeweging.nl).

## Weestfraschlönj-räis

*Bräist.* Foon e 3. bit 10. önj e stormmoune san soowen schoulere foon Bräist tuhuupe ma schoulere foon Risem än Naibel aw jöögedspräkeräis eefter Weestfraschlönj wään. We hain en oueremätje gou tuur åltumååle än hääwe foole spoos hädj än uk en mase spräketräaning fungen. Foole tunk tu Ute än Leo, wat dåt mååst ploond hääwe. Åles heet gödj klapd!

*Schoulere üt Bräist*

*E Friisk Foriining wanscht åål har lasmoote, goue waane än leesere foon dātheer blees en frööliken jül än luk än sünhäid önjt nai iir.*

**Impräsum: Friisk Foriining**, Friisk Hüs,  
Süderstr. 6,  
25821 Bredstedt/Bräist  
ViSdP: Manfred C. Nissen